

Gonoreja, informacija za pacijente

Zašto ste dobili ovu informaciju?

Vi ste zaraženi ili se sumnja da ste zaraženi gonorejom. Ovdje ćete dobiti informacije o gonoreji, kako se liječi i šta trebate učiniti.

Šta je gonoreja?

Gonoreja je bolest uzrokovana bakterijom. Ako ste inficirani, gonoreja se može naći u mokraćnom kanalu, vagini, rektumu i grlu.

Kako primjećujem da imam gonoreju?

Mnogi koji su zaraženi nemaju simptome, odnosno ne primjećuju da imaju infekciju. Neki osjećaju peckanje kada mokre. Neke boli grlo ako se bakterija tamo nalazi.

Žene mogu imati žućkasti iscjedak i/ili osjećati bol u donjem dijelu trbuha. Muškarci mogu imati žućkasti iscjedak iz mokraćnog kanala i osjećati bol u testisima. Ako ste imali analni odnos, možda ćete imati iscjedak iz rektuma.

Da li je gonoreja opasna?

Bez liječenja, žene mogu pretrpjeti oštećenje jajovoda što može otežati da zanesete ili dovesti do razvoja fetusa izvan materice (vanmaterična trudnoća). Muškarci mogu dobiti infekciju pasjemenika (epididimitis). Gonoreja također može uzrokovati infekciju očiju, a ponekad i bol u zglobovima.

Kako se prenosi gonoreja?

Gonoreja se prvenstveno prenosi nezaštićenim vaginalnim odnosom, analnim odnosom ili tokom oralnog seksa. Može se prenijeti i tokom predigre i sa seksualnim igračkama. Gonoreja je vrlo zarazna čak i ako nemate simptome.

Ne možete razviti imunitet na gonoreju i stoga je možete dobiti nekoliko puta.

Gonoreja se **ne** prenosi preko odjeće, peškira ili toaleta.

Kako se gonoreja liječi i koliko dugo ste zarazni?

Gonoreja se liječi antibioticima (putem injekcija i/ili tableta). Tretman je besplatan. Infekcija će nestati ako uzimate lijek kako je propisano i slijedite savjete koje ste dobili.

Ako ste dobili vrijeme za kontrolnu posjetu, morate ponovo doći u prijamnu ambulantu. Obično se, nakon otprilike dvije sedmice uzima novi uzorak kako bi se provjerilo da li je infekcija nestala.

Na šta treba da mislite kako ne bi zarazili druge osobe?

Gonoreja je opće opasna bolest prema Zakonu o zaštiti od zaraznih bolesti. Stoga se Vi koji bolujete od gonoreje ili se sumnja da imate gonoreju morate pridržavati određenih pravila, takozvanih pravila ponašanja.

Pravila ponašanja

- Morate osobi sa kojom imate seks reći da imate/možda imate gonoreju.
- Morate koristiti zaštitu ako imate seksualne odnose prije nego što se liječenje/testiranje uzorka završi.
- Morate doći na kontrolu ako se od Vas to traži.

Ako ste dobili neko pravilo ponašanja za koje smatrate da je pogrešno, možete se obratiti ljekaru za zarazne bolesti u vašoj regiji.

Kada imate gonoreju, ne smijete rizikovati da nekoga zarazite. Najsigurnije je da nemate snošaj ili bilo koju drugu vrstu seksa dok Vam ljekar ne kaže da više nemate gonoreju. To je obično tada kada ljekar dobije odgovor na kontrolni test, koji se radi nakon nekoliko sedmica. Ako svejedno imate seks, morate reći osobi da imate gonoreju i morate koristiti zaštitu (kondom).

Praćenje zaraze

Veoma je važno pronaći osobe koje boluju od gonoreje kako bi se mogle liječiti, dijelom kako bi se smanjio rizik od oštećenja (vidi gore), a dijelom kako bi se spriječilo širenje infekcije na više osoba.

Prema Zakonu o zaštiti od zaraznih bolesti, morate sudjelovati u praćenju zaraze. To znači da osobi koja prati širenje zaraze morate pružiti informacije o tome s kim ste imali seks. Ponekad je potrebno dobiti informaciju i do godinu dana unazad.

Ono što ćete ispričati je povjerljivo (tajno) i osobe koje ćete navesti neće saznati ko ste Vi. Samo će im biti rečeno da se moraju testirati. Podaci također neće biti upisani u Vaš medicinski karton, već u poseban, takozvani dokument za praćenje zarazne bolesti.

Više informacija

Više informacija o gonoreji se nalazi na 1177, Youmo (za Vas koji ste stari između 13 i 20 godina i želite informaciju na drugom jeziku) i UMO (online prijemna ambulanta za mlade).

www.1177.se



www.youmo.se



www.umo.se



O brošuri za prevenciju zaraznih bolesti

Brošuru za prevenciju zaraznih bolesti sastavlja Švedsko udruženje regionalnih medicinskih službenika i primjenjuje se na nacionalnom nivou.